

5. maaji 2022

UPA2022/66

"Inatsisartut aalajangiiffigisassaattut siunnersuut Naalakkersuisut peqquneqassasut nalunaarusiamik suliaqassasut, inatsi naammattumik qulakkeerinninnersoq meeqqat angerlarsimaffiup avataanut inissinneqartut taakkunanullu angajoqqaajusut Naalagaaffiit Peqatigiit Meeqqat pillugit isumaqatigiissutaat malillugit sullinneqartarnersut."

(Anna Wangenheim, Inatsisartunut ilaasortaq, Demokraatit)

Siullermik Demokratineersaq Anna Wangenheim qutsavigiumavarput oqaluuserisassanngortitsisimaneranut taamak pingaaruteqartigisumik.

Siumumit ima oqaaseqassaagut:

Siullermik ombudsmandip nalunaarusiaa Siumumittaaq arajutsisimangilarput. Meeqqanik angerlarsimaffiup avataanut inissiisarnermi nunatsinni tamatigut meeqqap pisinnaatitaaffia malitsinneqartarsimanginnera Siumumit soorunami akuersaarsinnaanngilluinnarparput.

Taamak oqareerluta innersuussutigissavarput siunnersuuteqartup siunnersuutaa sutigut tamatigut taparseratsigu. Isumaqarpugullu meeqqat angerlarsimaffiup avataani inissinneqartartut angajoqqaavi aamma sukumiisumik meeraq inissinneqaaqqanerata nalaani periusissiamik tassalu angajoqqaatut akisussaassusilimmik tigusiartuaaqqinnissaminnik periusissiortoqarnissaa avaqqunneqarsinnaanngitsoq. Kialluunniimmi nalunngilaa meerannguaq angajoqqaaminiit qimagutsinneqaraangami qanoq maqaasisartiginera - pisariaqartitsilersarneralu minnerulerneq ajorpoq. Angajoqqaanut attaveqarnissaq ajornanngippat attanneqassaaq.

Taamak oqareerluta isumaqarpugut meeqqanik inissiiginnartarneq kisimi ajornartorsiummik qaangiinerunngitsoq. Ajornartorsiummik iluarsiissuteqassagaanni angajoqqaat qanoq atugaqarsimanagerat qulaajaavigineqartarnissaa pisariaqarluinnartussatut Siumumit isigaarput. Qanorli inissisimanagerat aallaavigalugit, meeqqap inissinneqarnerata kinguninnguatigut, angajoqqaat ikiorserneqartarnissaat avaqqunneqartarsinnaanngitsutut isumaqarfigaarput.

Soorunami ilaatigut pisariaqavissinnaasarpog meerannguaq immikkorluinnaq atugaqarnera peqqutigalugu suliaqassasut suliarineqartassasog. Taamallu pisoqartillugu erseqqissarumavarput, soorunami meeqqap pisinnaatitaaffia sutigut tamatigut malitsinneqartassamat. Oqariartuutaalu nalilersuinermi aamma atorineqartarumaarnissaat Siumumit kissaatigaarput.

Taamak naatsumik oqaaseqarluta siunnersuuteqartumut qujavugut.



Siunnersuutip aappassaaneerneaqannginnerani ataatsimiitsitaliamut
susassaqartumut sukumiisumik eqqartorluarneqarnissaa siunertaralugu
innersuupparput.

Aslak W. Jensen, Siumut